



Uunga

Inatsisartuni ilaasortaq, Jess Svane, Siumut

Akissuteqaat, § 37 naapertorlugu apeqquteqaammut nr. 201-imut aalisakkanik suliffissuarni sulisussaaleqisarneq, akileraartarnermut aamma nuttarnernulernissamut tapiissutit pillugit apeqqutigineqartunut tunngatillugu.

02-08-2016
Sags nr. -

Apeqqut 1:

Nunami suliffissuarni suliffinnilu nalinginnaasuni aasaanerani sulisussaaleqisarneq qaangerniarlugu Naalakkersuisut qanoq iliulersaarpat?

Postboks 1601
3900 Nuuk
Tlf. (+299) 34 50 00
Fax (+299) 32 56 00
E-mail: isiin@nanoq.gl
www.nanoq.gl

Akissut:

Ilaatigut Royal Greenland, SIK allallu suleqatigalugit aalisakkanik suliffissuarni unammilligassat illoqarfinni arlalinniittut nalilersuiffigineqarput. Tassanngaaniit taava siunnerfilersukkanik tigussaasunik iliuusissanik suliaqartoqarsinnaassaaq, suliffissuarni sulisuusut siunissami sapinngisamik naammassisaqarfiunerpaamik sulisarsinnaalersinniarlugit.

Naalakkersuisut Suliffeqarnermi Periusissiaanni suliniummi 3-mi allassimavoq "kalaallit sulisussat piginnaanngorsaqqinneqarnissaat" tassungalu suliniummut PKU-mi pikkorissartitsisarnernut aningaasaliissutinik immikkoortitsisoqarnikuvoq, ilaatigut aalisakkanik suliffissuarni sulisuulersinnaasut pikkorissartinneqartarnerannut atorreqarsinnaasunik.

Suliniut 3 pillugu Naalakkersuisut kommunit qanimut suleqatigalugit ingerlatsipput, sulisussat maanna suliffeqanngitsut pikkorissartinneqartarnerannik, taakkua piginnaasassanik maanna suliffeqarnermi pisariaqartinneqartunik piginnaasaqalernissaat anguniarlugu, nunatsinni aalisakkanut suliffissuarni inuussutissarsiutinilu allani sulisussanik piginnaasalinnik pisariaqartitsiviusunut sammititaasunik.

Apeqqut 2:

Marlunnik suliffeqartunut akileraartarnikkut aaqqissuussisinnaaneq akileraartarnikkut aaqqissuusseqqinnissaq utaqqinngikkaluarlugu takorloorneqalereernerluni?

Akissut:

Aallaavigineqarpoq apeqqummi pineqartoq akileraartarnikkut aaqqissuusseqqinnissaq sioqqullugu ilutsimik pilersitsisoqarsinnaanersoq skattekort-imik inummut ataasiinnanngitsumik suliffilimmut tunniussisarnermik aaqqissuussinermik pilersitsisoqarsinnaanersoq.

Naalakkersuisut naliliineraat, akileraartarnermut atatillugu allaffissornikkut aaqqissuusseqqinnissaq maanna atuuttuusooq, misilittagaqarfigineqarluartullu, allanngortinneqarsinnaaneranut tunngatillugu akileraartarnikkut aaqqissuusseqqinnissaq utaqqineqarluarsinnaasooq, allannguut pingaaruteqartunik ersarissunillu allaffissornikkut aningaasaqarnikkullu

iluaqutissarsivigineqarsinnaanngippat. Misilittakkat naapertorlugit allaffissornikkut suleriaatsinik atuuttunik maanaannakkut allannguisarnejq nalorninermik pilersitsisarmat.

Apeqquut 3:

Nuttarnerulernissamut aningaasaateqarfiup inatsisitaata Kommuunit qanimut suleqatigalugit nalilersuiffiqeqinneqarsinnaanera eqqarsaatigineqalereernerluni?

Akissut:

Aallarniutigalugu erseqqissarneqassaaq nuttarsinnaanermut aningaasaliissutaasartut Aningaasanut inatsimmi kontomi 64.13.19 -mi inissisimmammata, aqunneqarlutillu Inuussutissarsiornermut, Suliffeqarnermut Niuernermullu Naalakkersuisoqarfimmiit. Malittarisassaaq tassani tunngavigineqartoq tassaavoq Suliffeqarnermi innersuussisarnejq il.il. pillugit Inatsisartut inatsisaat nr. 5, 8. juni 2014-imeersoq. Aningaasaliissutillu taamaasillutik aningaasaateqarfimmiit aqunneqanngillat.

Kingusinnerpaamillu nuttarsinnaanermut aningaasaliissuteqartarnermut inatsit UKA 2015-imi allannguuteqartinneqarpoq (<http://lovgivning.gl/lov?rid={0EF18F0C-6C65-4C58-AA92-341628DAD2DC}>) soorlutaaq Inuussutissarsiornermut, Suliffeqarnermut Niuernermullu Naalakkersuisoqarfik ingerlaavartumik kommunini aamma inuussutissarsiortunik oqaloqateqartartoq nuttarsinnaanermut tapiissutaasartut pillugit. Taamaasillunilu inatsisinik allannngortitsisinnaaneq pissusissamisoortumik kommunit qanimut suleqatigalugit pissaaq.

Ilaatigut aalisakkanut suliffissuarni sulisussaaleqisarnejq annikinnerpaaffissaminiitsinniarlugu Naalakkersuisut maannamut akuersissutigallarsimavaat inuit 26-it ataavartumik nuunnissaat imaluunniit nuukkallarnissaat nunatsinni aalisakkanut suliffissuarnut tunngatillugu, tassani pingaartumik nunatta avannaani.

Inussiarnersumik inuulluaqqusillunga
Med venlig hilsen


Vittus Qujaukitsoq